

Na opinion di Nel Oduber MEP a crece bao su mando

# Segun Nel hasta Betico por a worde reemplaza!

\*MEPistanan ta recorda Nel cu ta circunstancia a hacie lider

\*Betico no tabata mira Nel como lider pero como esun cu lo zink Aruba

ORANJESTAD(AAN)—Po r reemplaza tur hende. Esaki ta opinion di Nelson Oduber, Ministro Presidente di Aruba, cu durante su conferencia di prensa a trece dilanti cu su persona mes a reemplaza lider di Aruba y cu e partido a bay dilanti bao su mando! E expresion di Nelson Oduber a causa furia cerca hopi MEPista. Nan a muestra cu Nel mester haci conteo di su votonan. Ta pa circunstancia el a bira lider di MEP y, aunke semper e tabata tin “fluistercampagne” contra Betico, hamas e por midi su mes cu Betico, cu a realiza kico Nelson Oduber por haci cu Aruba si e haya e oportunidad. Durante e conferencia di prensa cu el a duna e siman aki, Nelson Oduber a baha pisa ariba Rob Henriquez, kende a nenga Gobierno di sigui mishi den caha di Pueblo. Nelson Oduber a hunga cu cifranan dor di bisa promer cu ora el a asumi gobernacion tabata tin bon placa den caha pa despues bisa cu tabata tin un debe di 200.000. Cu el a haci e debe di 200 Mil bira 2 Milyard awor, Nelson Oduber no por a splica. Loke si a pone MEPistanan reacciona ayera, tabata e hecho cu Nel Oduber a dicidi

di hinca Betico Croes den su disertacion. “Ta conoci cu Nelson Oduber no ta comprende cu un Ministro Presidente mester sa con pa expresa su mes. E no mester a usa Betico pa kere cu e por eleva su mes ariba Betico,” un MEPista a trece dilanti. A manda Nelson Oduber bay haci un conteo di e cantidad di voto cu e ta haya y cu ta muestra cu nunca e tabata tin e confianza absoluto cu MEPistanan tabata tin den Betico Croes. Nelson Oduber a alega cu tur hende na mundo por worde reemplaza. E mes a reemplaza Betico y manera Nelson Oduber a bisa ta crece so MEP a crece. Cu otro palabra, el a supera Betico! MEPistanan cu a acerca DIARIO a muestra cu Nelson

Oduber no mester lubida cu ta circunstancianan a hacie lider di MEP. “E tabata mas cerca di porta cu paden ora Betico a haya e accidente. Tur hende sa cu e aña Betico a bisa Nelson Oduber cu si e no baha como Diputado, e ta zink Aruba. Tabata un momento visionario den bida di Betico,” a worde bisa. E accidente cu Betico Croes a sufri dia 31 di December 1985 a trece cambio inespera. MEP no tabata prepara pa un lider nobo. Como Nel tabata tey na e puesto cu e tabata den partido, a lague actua como lider di e partido. “Nunca Nelson Oduber realmente a demostra kico e debe Betico pa loke ta trata su carera politico. Mientras Betico Croes 11 luna largo a lucha cu su bida, no tabata tin

e interes spera di parti di Nelson Oduber y hopi cu awe ta colga na imagen di Betico, pa e lider di e partido. Den e tempo cu Betico Croes tabata malo, Nelson Oduber a reemplace y e partido, cu tabata completamente deshaci, a laga Nelson Oduber lider. Si Betico no a haya e accidente, ta pregunta si Nelson Oduber lo a haya oportunidad un dia pa bira lider di MEP,” a worde muestra. Pa e hecho cu Nelson Oduber a insinua cu bao dje ta crece MEP a crece, a worde muestra cu semper tabata tin campananan contra Betico den MEP. Por ehempel, Nelson Oduber a haci gran

esfuerzo pa trece Coastal y e lema tabata cerca grupo di Nel cu “Betico a cera lago y Nel a habri Coastal”. A worde declara cu Nelson Oduber a lubida di bisa cu e tabata Diputado encarga cu asuntonan economico ora Lago cera su portanan y cu e no tabata sa di tene Exxon na Aruba. E hecho cu abiertamente Nelson Oduber a bay midi su mes cu Betico Croes pa hopi MEPista tabata un ridiculez. Nan a muestra cu si ta na forma normal mester a reemplaza e lider di MEP, chens tabata grandi cu Betico lo no a scohe Nel cu el a mira como homber capaz di zink e pais!

TELEFONNAN DI DIARIO  
582-6747- FAX 582-8551

## 1-800-NEUS!!



**BEST DEAL**  
Tel: 5827100  
(Pariba di Aruba Bank, Paradera)  
**Sticker Book**  
  
cuminsando for  
Afl. 1,=